

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KEEMPAT,  
PARLIMEN KETIGA BELAS**

---

**PERTANYAAN : BERTULIS**

**DARIPADA : DATO' IR. HAJI NAWAWI BIN  
AHMAD  
[LANGKAWI - BN]**

**SOALAN (NO. 30)**

Minta **MENTERI BELIA DAN SUKAN** menyatakan keberkesanan program Mengenai Pasti Bakat Sukan (MyTID) yang telah diperkenalkan sejak tahun 2007 dan apakah perancangan pihak Kerajaan dalam memastikan program ini terus memberi impak besar dalam melahirkan bakat-bakat baru kearah kecemerlangan masa depan sukan negara.

**JAWAPAN**

Yang di-Pertua,

1. Untuk makluman Ahli Yang Berhormat, Program Mengenalpasti Bakat Sukan (TID) yang telah bermula pada 2007 telah dilaksanakan melalui Institut Sukan Negara (ISN) yang telah menyaring lebih dari 50,000 murid setiap tahun dari pelbagai peringkat umur melalui program Cari Juara, ‘*Talent Spot*’, *Multilateral*, Hoki 1MAS dan TID Am, dan ‘*Ride With Pride*’. Impak dari program berkenaan seramai 16,866 murid telah terpilih. Seterusnya seramai 8,072 telah diserap ke program pembangunan di bawah pengurusan Majlis Sukan Negara (MSN) untuk dibangunkan dan diasah bakat mereka. Melalui program TID ini juga Kementerian Belia dan Sukan telah mengenalpasti seramai 13 atlet muda telah berjaya mewakili dalam beberapa sukan di peringkat sekolah menengah iaitu olahraga, memanah, sepak takraw, bola baling, bola sepak dan hoki termasuk terpilih ke pasukan pelapis SUKMA.
2. KBS seterusnya melaksanakan Program Pembangunan Bakat Sukan Akar Umbi (MyTID) pada tahun 2015 kepada murid berumur 7 tahun bagi tempoh perancangan selama 5 tahun dengan menyaring murid seramai 100,000 murid. Seramai 104,956 murid telah disaring bakat di seluruh negara dengan kerjasama dari Kementerian Pendidikan Malaysia (KPM) khususnya Bahagian Sukan.

3. Bagi memastikan kesinambungan pencarian bakat sukan, program MyTID 2017 bakal dilaksanakan melalui 2 pendekatan pencarian bakat sukan iaitu Model Perkembangan Kemahiran dan Program '*Talent Outreach*'. Model Perkembangan Kemahiran menawarkan program penilaian tahap perkembangan murid-murid yang berada di Tahap 1 sekolah kebangsaan. Program ini bertujuan mengukuhkan kurikulum pendidikan jasmani sedia ada, yang berpotensi memberi dwimanfaat iaitu ibu bapa rakyat Malaysia mendapat penilaian percuma tentang tahap perkembangan anak masing-masing menerusi program sekolah dan ISN dapat memantau bakal-bakal juara sukan menerusi program sekolah. Seterusnya ISN dapat memantau bakal-bakal juara sukan menerusi tahap perkembangan yang mengatasi julat norma.
4. Manakala program '*Talent Outreach*' pula bertujuan menggalakkan seberapa ramai rakyat Malaysia di luar bandar untuk melibatkan diri di dalam sukan-sukan yang diminati. Dengan ISN melantik jurulatih-jurulatih sukan bertauliah di pusat-pusat yang ditentukan, masyarakat akan diberi latihan yang sistematis untuk bersukan. Bakat sukan boleh dikenalpasti dalam kalangan mereka yang kekal di dalam program *outreach* tersebut untuk jangkamasa yang panjang.
5. Program-program mencungkil dan menggilap bakat yang dilaksanakan oleh KBS adalah secara menyeluruh dan tidak memfokuskan kepada golongan tertentu secara berterusan bagi memastikan bakat sukan terus digilap dan berpotensi mengharumkan nama negara di peringkat kebangsaan mahupun antarabangsa.